

POEMETI



por

PUERETI

da Brian E. Drake



Creative Commons 2018 by Brian E. Drake
Attribution-NonCommercial-ShareAlike 3.0 Unported
International

THE OXFORD RATIONALIST
56 Albany Street
Oxford, NY 13830 USA
(607) 843-2636
brian.eric.drake@gmail.com

KONTENAJI



La neta uceleto	5
Lu prizas kuketi	6
Me esos muzikisto	7
Treno-irado	8
L'Ombreto	9
Fola kansoni	10
Roberto Rapoto	13
Mea bon amiko	14
Luno, ho Luno	15
Marchante ad London	17
Spektaklo	19
Sur la voyo	20
Voyajo al urbo	21
La granda soldatino	22
Yen venas old kaulo	23
La vakanco	25

POEMETI

por

PUERETI

da Brian E. Drake



LA NETA UCELETO

Me konocas uceleto,
Tre belega uceleto,
Qua mantenas bon ordino
Kom boneg menajistino.

Kande uceletoyuni
(Quale omna ucelyuni)
Desnetigas lia nesto,
Ho! El facas grand tempesto!

LU PRIZAS KUKETI

Ul stranja hometo
Kun blu chapeleto
Advenas e kompras
Singladie kuketo.

Ta stranja hometo
Men pagas moneto.
Ma por chokolado
Lu ofras rideto.




ME ESOS MUZIKISTO

La voyo esas bona, la vetero es belega,
La nubi esas fora e la suno es varmega.
La mondo nur bezonas ingenioza trubaduro,
E me havas mea fluto, e me havas la tamburo.

Venas l'advoko


A nova loko!

Me metas la chapelo e me metas mea shui,
Pakigas ul nutraji e pakigas la sur-shui,
E me tut! tut! tut-as! E me pum! pum! pum-as!
Til ke uceli kantas e til ke abeli zumas.



TRENO-IRADO

Irante per la treno,
Klik-klak! Klik-klak!
Manjante la pistachi,
Krik-karak! Krik-karak!
Preterpasas nun la ponti,
Nun la prati, nun la monti.
La horlojo kontas milii,
Tik-tak! Tik-tak!





L'OMBRETO



Me havas bel ombreto
Qua akompanas me,
E kande me saltetas,
Saltetas lu anke.

Ma kande me dormeskas
Ed extingas kandeleteto,
Me nule savas ube
Adiras ta ombreto!

FOLA KANSONI





Tina Tipelo
Trovis abelo.
‘Ma ube,’ el dicis,
‘Es lua mielo?’



Maria Medoro
Sidas en arboro
Vartante ucelo
Portanta trezoro.

Mikra Billi Bumpo
Stacis sur stumpo
Pozante kom statuo —
Ma falis adsur pumpo.





ROBERTO RAPOTO


Bodito bodoto, Roberto Rapoto
Segliras ad India en granda boto.
Il hisas naztuko di matro kom flago.
Dejuno konsistas ek pano e frago
E lua hundyuno guvernas la roto.
Do tale segliras Roberto Rapoto.

MEA BON AMIKO

Mea bon amiko
Prizas mea nomo.
Mea bon amiko
Venas a la domo.

Mea bon amiko
Havas red bobino.
Mea bon amiko
Pleas violino.


Humuroza esas
Mea bon amiko.
Bona homo esas
Mea bon amiko!



LUNO, HO LUNO

Luno, ho Luno en steloza cielo,
Adube vu sempre iras?
Luno, ho luno en blua brilo,
Nun mikra opalo, nun granda berilo,
Adube vu sempre iras?

‘Me iras a fora landi e mondi,
Al monti di Ceylon e super la ondi
Ube Sindbad segliris ed Ahab sinkis,
Ed al agri ube le Caesar vinkis.
Me iras inter la steli jiranta
E kun kometi deliranta.
Adibe me sempre iras.’





MARCHANTE AD LONDON




Hundyuno, Katyuno, e yuna Museto
Marchas felice ad London.
Hundyuno avide vizitos la Rejo,
Katyuno solene parlernos solfejo,
E yuna Museto zumas zumeto
Marchante felice ad London.


Hundyuno, Katyuno, e yuna Museto
Retro-marchas adheme.
Hundyuno habile vizitis la Rejo,
Katyuno facile parlernis solfejo,
Museto ankore zumas zumeto
Retro-marchante adheme.




SPEKTAKLO



Sioro Herodio
Siflas melodio.




Onklino Toni
Jonglas baloni.




Old Avo Dono
Kantas kansono.

Siorino Triggo
Dansas jigo.




Kapitano Brolo
Pleas violo.

E se tu permisos,
Tun me kisos.





SUR LA VOYO



Sur la voyo a Milano
Me renkontris grand rafano
Qua, manjante marcipano,
Pleis Mozart per piano.

Sur la voyo a Toronto
Me renkontris rodomonto
Qua naracis bel rakonto
Pri luktar kun mastodonto.



Sur la voyo a Chiclayo
Me renkontris gros kobayo
Qua kurtezis papagayo
En red karavanserayo.


Ed, renkontrinte li,
Me rivenas nun a vi.

VOYAJO AL URBO

Kelka kozi
Sen repozi
Iris aden New York urbo.
Ovo, plumo,
E legumo
Trovis su en granda turbo.

‘Me ruptesos,
Aplastesos!’
Kriis l’ovo tre timanta.
La legumo
Zumis zumo
Pro kolombo minacanta.

Ma la plumo,
Sub la lumo
Di ta ecitanta loko,
Ridis tante
Provokante
Quaze lo es bela moko!



LA GRANDA SOLDATINO




Me havas chapeleto
E me havas red jaketo
E brilanta espadeto
Por servir la rejino.


E quale mea frato,
Me ya marchos kom soldato
Kun la hundo e la kato
Por servir la rejino.

YEN VENAS OLD KAULO

Yen venas old kaulo portanta boneto,
Beleta boneto kun verda rubando.
Dop elu karoto kun or braceleto
Ed en la hararo jilfloro-girlando.

E nun onyonino en robo hel-flava
Pazetas lejere en ica parado,
E fine vinagro-botelo tre brava
Fiere spricizas la friand salado.





LA VAKANCO

Belega belugo
En la oceano
Kun sua kompano,
Natanta tortugo,

Voyajis flanante
De kold latitudi
Til varma Bermudi,
Totvoye ridante.

E dum la eklipso
La du kamaradi
Drinkis limonadi
E dansis kalipso.